



官常典第四百三十一卷

將帥部彙考一

夏后氏

帝啟三歲始命卿爲將

按尙書甘誓大戰於甘乃召六卿

蔡傳天子六軍其將皆命卿

帝仲康元歲始命引侯掌六師

按尙書引征惟仲康肇位四海引侯命掌六師

蔡傳仲康命引侯

掌王六師爲大司馬

周

周制大司馬定軍旅卒伍之制以九伐正邦國

按周書周官司馬掌邦政統六師平邦國

蔡傳夏

官卿主戎馬之事掌國征伐統御六軍平治邦國平謂強不得凌弱衆不得暴寡而人皆得其平也軍政莫急於馬故以司馬名官何莫非政獨戎政謂之政者用以征伐而正彼之不正王政之大者也

按周禮夏官司馬

訂義

王昭禹曰馬者甲兵之具王政所重故自夏官卿一人至中士十有六人皆

以司馬名官

惟王建國辨方正位體國經野設官分職以爲民極乃立夏官司馬使帥其屬而掌邦政以佐王平邦國

訂義

鄭鏐曰注謂政者正也上之所以正下也夏官獨謂政官司馬有九法九伐之制所以正

其不正斯可謂之政矣王者之於邦國欲使各得其平司馬佐之以政則平也易矣然政以平邦國治職亦以平邦國何也治出於太宰則平之以道政掌於司馬則平之以政治典則平於順治之前政典則平於叛逆之後

政官之屬大司馬卿一人小司馬中大夫二人軍司馬下大夫四人輿司馬上士八人行司馬中士十有六人旅下士三十有二人府六人史十有六人胥三十有二人徒三百有二十人

訂義黃氏曰

司馬置屬與五官稍異小司馬而下有軍司馬輿司馬行司馬輿司馬掌車行司馬掌卒軍司馬兼掌之軍司馬如天官宰夫地官鄉師以軍名官其職可知

凡制軍萬有二千五百人爲軍王六軍大國三軍次國二軍小國一軍軍將皆命卿二千有五百人爲師師帥皆中大夫五百人爲旅旅帥皆下大夫百人爲卒卒長皆上士二十有五人爲兩兩司馬

皆中士五人爲伍伍皆有長一軍則二府六史胥十人徒百人

訂薛平仲曰周官序官之例未嘗

有序事之法惟司馬所載制軍之事爲詳而後官屬之緩急始次第而舉豈非兵者國之大事政典所以平邦國者其規畫固當蚤正歟自調民之法立民之從事於軍者勞逸出入之相權而力常有餘矣於是萬二千五百人爲一軍有不容損益者自制軍之數立國之有軍者內外輕重之相制而勢可得合矣於是王六軍以至小國一軍有降殺之踰陪焉軍有定制帥其軍者非威令素孚不行也於是大爲之將而將皆命卿小爲之長而長皆上士有以定尊卑上下之志焉軍有帥則文移之往來政令之征召有不可略於是一軍則二府六史十胥百徒有以爲文書調度之備焉舉軍政之要莫先斯四者先王規畫實爲之井井繩繩而不紊觀叙事之法可攷大司馬之職掌建邦國之九法以佐王平邦國

訂賈氏曰此九法以下皆言邦國以施於諸侯爲

主 鄭鏐曰九法皆佐王平邦國之典然建牧立監太宰之事設儀辨位大宗伯之事制畿封國大司徒之事大司馬之所謂建者特明其法以布告之

制畿封國以正邦國

訂

陳君舉曰九畿九服周制也要之法度所及止于六服書云六服羣辟罔

不承德其朝貢盡如禮止于五服書云六年五服一朝是也

設儀辨位以等邦國

訂鄭康成曰儀謂諸侯及諸臣之儀辨別也別尊卑之位

進賢興功以作邦國

訂鄭鏐曰見于德行之謂賢見于事業之謂功賢可尊也受七命者進爲八

命之牧受八命者進爲九命之伯功可錄也或加之以地或進之以律進其賢者則不賢者自礪
興其功者則無功者知奮邦國可作

建牧立監以維邦國

訂鄭康成曰此卽大宰建其牧立其監 林椅曰乃屬長連帥之比

制軍詰禁以糾邦國

訂鄭鏐曰無曲防無遏糴無有封而不告無以妾爲妻是謂詰禁有軍以馭

其亂有禁以詰其違則邦國可糾矣

施貢分職以任邦國

訂王昭禹曰貢以物言施貢則各以其所有職以事言分職則各以其所能

施貢以任其財分職以任其力此之謂任邦國

簡稽鄉民以用邦國

訂王昭禹曰萬二千五百家爲鄉大國三鄉次國二鄉小國一鄉所以處民

也簡選也稽攷也簡其強弱稽其多寡然後衆可用故曰以用邦國

均守平則以安邦國

訂鄭鏐曰城郭溝池任其萬民便其守禦無使國大而所守者狹國小而所

守者廣匡人達法則以匡邦國使無敢反側以聽王命無使職貢宜輕者或過乎則宜重者或不
及乎則守均則力不困則平則心不疑而邦國可安

比小事大以和邦國

訂鄭康成曰比猶親使大國親小國小國事大國相合和也易比象曰先王

以建萬國親諸侯

以九伐之法正邦國

訂鄭鏐曰諸侯有罪輕重不一至用兵以誅討之必聲其罪左氏曰有鐘鼓

曰伐言聲其罪也

馮弱犯寡則眚之

訂鄭康成曰馮猶乘陵也言不字小而侵侮之

賊賢害民則伐之

訂鄭鏐曰伐如伐木之伐去其根本勿使再生之理賢足以長民賊之是不義

民者邦所恃害之是不仁聲罪而伐翦夷去之

暴內陵外則壇之

訂鄭鏐曰暴內則爲惡於國中陵外則肆侮於四鄰不可以爲君宜除而去之

如除地爲壇之壇

野荒民散則削之

訂鄭鏐曰王者量地以制邑度地以居民爲諸侯者有田野不能治至於荒蕪

有人民不能聚至於離散則不能保有其大也故削之使小如漢削諸侯王郡是也

負固不服則侵之

訂鄭康成曰負猶恃也固險可依以爲固也不服不事大也

賊殺其親則正之

訂鄭康成曰正之者執而治其罪

放弑其君則殘之

訂鄭康成曰放逐也殘殺也

犯令陵政則杜之

訂鄭鏐曰犯令以諸侯而抗天子之命陵政以諸侯而侵天子之權

外內亂鳥獸行則滅之

訂鄭康成曰王霸記曰悖人倫外內無以異於禽獸則誅滅去之也

漢

漢承秦制設太尉大將軍皆以主兵後改大司馬其屬有護軍都尉校尉等官又設前後左右將軍及西域置都護戊己校尉伏波樓船諸名號隨時增減按漢書百官表太尉秦官金印紫綬掌武事武帝建元二年省元狩四年初置大司馬以冠將軍之號宣帝地節三年置大司馬不冠將軍亦無印綬官屬成帝綏和元年初賜大司馬金印紫綬置官屬祿比丞相去將軍哀帝建平二年復去

大司馬印綬官屬冠將軍如故元壽二年復賜大司馬印綬置官屬去將軍位在司徒上有長史秩千石 前後左右將軍皆周末官秦因之位上卿金印紫綬漢不常置或有前後或有左右皆掌

兵及四夷有長史秩千石

護軍都尉秦官武帝元狩四年屬大司馬成帝綏和元年居大司馬

府比司直哀帝元壽元年更名司寇平帝元始元年更名護軍

司隸校尉周官武帝征和四年

初置持節從中都官徒千二百人捕巫蠱督大奸猾後罷其兵察三輔三河弘農元帝初元四年去節成帝元延四年省綏和二年哀帝復置但爲司隸冠進賢冠屬大司空比司直 城門校尉掌

京師城門屯兵有司馬十二城門候中壘校尉掌北軍壘門內外掌西域屯騎校尉掌騎士步兵校尉掌上林苑門屯兵越騎校尉掌越騎長水校尉掌長水宣曲胡騎又有胡騎校尉掌池陽胡騎不常置射聲校尉掌待詔射聲士虎賁校尉掌輕車凡八校尉皆武帝初置有丞司馬自司隸至虎賁校尉秩皆二千石 西域都護加官宣帝地節二年初置以騎都尉諫大夫使護西域三十六國有副校尉秩比二千石丞一人司馬候千人各二人

戊己校尉元帝初元元年置有丞司馬各一人候五人秩比六百石

按開府元龜武帝征閩越

又有伏波樓船及伐朝鮮大宛復置橫海度遼貳師宣帝又增蒲類破羌其餘雜號非一蓋權時之制因事立名亦不嘗設也

成帝綏和元年罷將軍官 按漢書成帝本紀綏和元年夏四月以大司馬驃騎大將軍爲大司馬罷將軍官益大司馬奉如丞相

後漢

後漢設大將軍驃騎車騎將軍衛將軍前後左右度遼諸將軍以征伐背叛皆有部曲又設匈奴中郎將烏桓校尉護羌校尉以主邊事 按後漢書百官志將軍不常置本注曰掌征伐背叛比公者四第一大將軍次驃騎將軍次車騎將軍次衛將軍又有前後左右將軍 注 蔡質漢儀曰漢興置

大將軍驃騎位次丞相車騎衛將軍左右前後皆金紫位次上卿典京師兵衛四夷屯警

初武帝以衛青數征伐有功以爲大將軍欲尊寵之以古尊官惟有三公皆將軍始自秦晉以爲卿號故置大司馬官號以冠之其後霍光王鳳等皆然成帝綏和元年賜大司馬印綬罷將軍官世祖中興吳漢以大將軍爲大司馬景丹爲驃騎大將軍位在公下及前後左右雜號將軍衆多皆主征

伐事訖皆罷

注 魏略曰曹公置都護軍中尉置護軍將軍亦皆比二千石旋軍並止罷

明帝初卽位以弟東平王蒼有賢才以爲驃騎將軍以王故位在公上數年後罷章帝卽位西羌反故以舅馬防行車騎將軍征之還後罷和帝卽位以舅竇憲爲車騎將軍征匈奴位在公下還復有功遷大將軍位在公上復征西羌還免官罷安帝卽位西羌寇亂復以舅鄧騭爲車騎將軍征之還遷大將軍位如憲數年復罷自安帝政治衰缺始以嫡舅耿寶爲大將軍常在京都順帝卽位又以皇后父兄弟相繼爲大將軍如三公焉

注

梁冀別傳曰元嘉二年又加冀禮儀大將軍朝到端門

若龍門謁者將引增掾屬舍人令史官騎鼓吹各十人

長史司馬皆一人千石

注

東觀書曰竇憲作大將軍置長史司馬員吏官屬位次太傅

本注曰司馬主兵如太尉從事中郎二人六百石本注曰職參謀議

注

東觀書曰大將軍出征置

中護軍一人

掾屬二十九人

注

按本傳東平王作驃騎掾史四十人

令史及御屬三十一人本注曰此皆府員職也又賜官騎三十人及鼓吹

注

漢官儀曰鼓吹二十

人非常員舍人十人

其領軍皆有部曲大將軍營五部部校尉一人比二千石軍司馬一人比千石部下曲有軍候一人比六百石曲下有屯屯長一人比二百石其不置校尉部但軍司馬一人又有軍假司馬假候皆爲副貳其別營領屬爲別部司馬其兵多少各隨時宜門有門候其餘將軍置以征伐無員職亦有部曲司馬軍候以領兵其職吏部集各一人總知營事兵曹掾史主兵器稟假掾史主稟假禁司又置外刺刺姦主罪法明帝初置度遼將軍以衛南單于衆新降有二心者後數有不安遂爲常守

注

漢官儀曰度遼將軍孝武皇帝初用范明友明帝十八年行度遼將軍事安帝元初元年

置眞銀印青綬秩二千石長史司馬六百石東觀書云司馬二人

又按志使匈奴中郎將一人比二千石本注曰主護南單于置從事二人有事隨事增之掾隨事爲員護羌烏桓校尉所置亦然

注

漢官儀曰擁節屯中步南設官府掾史單于歲遣侍子來朝謁者

當送迎焉得賂弓馬氈屬他物百餘萬謁者事訖還具表付帑藏詔書勅自受

護烏桓校尉一人比二千石本注曰主烏桓

注

漢官儀曰擁節長史一人司馬二人皆六百石并

領鮮卑容賜質子歲時互市焉晉書曰漢置東夷校尉以撫鮮卑

護羌校尉一人比二千石本注曰主西羌

注

漢官儀曰擁節長史司馬二人皆六百石

光武帝建武七年省長水射聲二校尉

按後漢書光武帝本紀建武七年是歲省長水射聲二校

尉

注

前書音義曰長水地名胡騎所屯射聲謂工射者夜中聞聲則射之因以爲名二校尉皆武

帝置今省之

建武九年初置青巾左校尉省關都尉復置護羌校尉

按後漢書光武帝本紀建武九年春三月

辛亥初置青巾左校尉官是歲省關都尉復置護羌校尉官

注

漢官儀曰武帝置秩比二千石持

節以護西羌王莽亂遂罷時班彪議宜復其官以理冤結帝從之以牛邯爲護羌校尉都於隴西

令居縣

建武十三年罷左右將軍官

按後漢書光武帝本紀建武十三年夏四月罷左右將軍官

注前

書曰左右將軍周官也秦漢因之至此罷

按賈復傳復知帝欲偃干戈修文德不欲功臣擁衆京師乃與高密侯鄧禹並剽甲兵敦儒學帝深

然之遂罷左右將軍

建武十五年六月庚午復致屯騎長水射聲三校尉官改青巾左校尉爲越騎校尉 按後漢書光

武帝本紀云云

明帝永平十七年初置西域都護校尉 按後漢書明帝本紀永平十七年冬十一月初置西域都

護戊己校尉

注

宣帝初置鄭吉爲都護護三十六國秩比二千石元帝置戊己校尉有丞司馬各

一人秩比六百石戊己中央也鎮覆四方見漢官儀亦處西域鎮撫諸國

靈帝中平五年初置西園八校尉 按後漢書靈帝本紀中平五年秋八月初置西園八校尉

注

山陽公載記曰小黃門蹇碩爲上軍校尉虎賁中郎將袁紹爲中軍校尉屯騎校尉鮪鴻爲下

軍校尉議郎曹操爲典軍校尉趙融爲助軍左校尉馮芳爲助軍右校尉諫議大夫夏牟爲左校

尉淳于瓊爲右校尉凡八校尉皆統於蹇碩

中平六年省扶風都尉置漢安都護 按後漢書獻帝本紀中平六年九月甲戌卽皇帝位十二月

戊戌省扶風都尉置漢安都護

注

扶風都尉比二千石武帝元鼎四年置中興不改至此以羌擾

三輔故省之置都護令總統四方

晉

晉設大司馬太尉大將軍皆以統軍旅之事而驃騎將軍次之按晉書職官志大司馬古官也漢制以冠大將軍驃騎車騎之上以代太尉之職故恆與太尉迭置不並列及魏有太尉而大司馬大將軍各自爲官位在三司上晉受魏禪因其制以安平王孚爲太宰鄭沖爲太傅王祥爲太保義陽王望爲太尉何曾爲司徒荀顗爲司空石苞爲大司馬陳騫爲大將軍凡八公同時並置唯無丞相焉自義陽王望爲大司馬之後定令如舊在三司上

大將軍古官也漢武帝置冠以大司馬名爲崇重之職及漢東京大將軍不常置爲之者皆擅朝權至景帝爲大將軍亦受非常之任後以叔父孚爲太尉奏改大將軍在太尉下及晉受命猶依其制位次三司下後復舊在三司上太康元年琅邪王伷遷大將軍復制在三司下伷薨後如舊開府儀同三司漢官也殤帝延平元年鄧騭爲車騎將軍儀同三司儀同之名始自此也及魏黃權以車騎將軍開府儀同三司開府之名起於此也

驃騎車騎衛將軍伏波撫軍都護鎮軍中軍四征四鎮龍驤典軍上軍輔國等大將軍左右光祿光祿三大夫開府者皆爲位從公

大司馬大將軍太尉驃騎車騎衛將軍諸大將軍開府位從公者爲武官公皆著武冠平上黑幘文武官公皆假金章紫綬著五時服其相國丞相皆袞冕綠綬所以殊於常公也 諸公及開府位從公者品秩第一食奉日五斛太康二年又給絹春百疋秋絹二百疋綿二百斤元康元年給菜田十頃騶十人立夏後不及田者食奉一年置長史一人秩一千石西東閤祭酒西東曹掾戶倉賊曹令史屬各一人御屬閣下令史西東曹倉戶賊曹令史門令史記室省事令史閣下記室書令史西東曹學事各一人給武賁二十人持班劍給朝車駕駟安車黑耳駕三各一乘祭酒掾屬白蓋小車七乘輅車施耳後戶皁輪犢車各一乘自祭酒已下令史已上皆皁零辟朝服太尉雖不加兵者吏屬皆降服司徒加置左右長史各一人秩千石主簿左西曹掾屬各一人西曹稱右西曹其左西曹令史已下人數如舊令司空加置導橋掾一人諸公及開府位從公加兵者增置司馬一人秩千石從事中郎二人秩比千石主簿記室督各一人舍人四人兵鎧士曹營軍刺姦帳下都督外都

督令史各一人主簿已下令史已上皆絳服司馬給吏卒如長史從事中郎給侍二人主簿記室督各給侍一人其餘臨時增崇者則褒加各因其時爲節文不爲定制 諸公及開府位從公爲持

節都督增參軍爲六人長史司馬從事中郎主簿記室督祭酒掾屬舍人如常加兵制

驃騎

已下及諸大將軍不開府非持節都督者品秩第二其祿與特進同置長史司馬各一人秩千石主簿功曹史門下督錄事兵鎧士賊曹營軍刺姦帳下都督功曹書佐門吏門下書吏各一人其假節爲都督者所置與四征鎮加大將軍不開府爲都督者同四征鎮安平加大將軍不開府持節都督者品秩第二置參佐吏卒募府兵騎如常都督制唯朝會祿賜從二品將軍之例然則持節都督無定員前漢遣使始有持節光武建武初征伐四方始權時置督軍御史事竟罷建安中魏武爲相始遣大將軍督之二十一年征孫權還夏侯惇督二十六軍是也文帝黃初三年始置都督諸州軍事或領刺史又上軍大將軍曹真都督中外諸軍事假黃鉞則總統內外諸軍矣魏明帝太和四年秋宣帝征蜀加號大都督高貴鄉公正元二年文帝都督中外諸軍尋加大都督及晉受禪都督諸軍爲上監諸軍次之督諸軍爲下使持節爲上持節次之假節爲下使持節得殺二千石以下持節殺

無官位人若軍事得與使持節同假節唯軍事得殺犯軍令者江左以來都督中外尤重唯王導等權重者乃居之

三品將軍秩中二千石者著武冠平上黑幘五時朝服佩水蒼玉食奉春秋賜綿絹菜田田騶如光祿大夫諸卿制置長史司馬各一人秩千石主簿功曹門下都督錄事兵鎧士賊曹營軍刺姦吏帳下都督功曹書佐門吏門下書吏各一人

中領軍將軍魏官也漢建安四年魏武丞相府自置及拔漢中以曹休爲中領軍文帝踐祚始置領軍將軍以曹休爲之主五校中壘武衛等三營武帝初省使中軍將軍羊祜統二衛前後左右驍衛等營卽領軍之任也懷帝永嘉中改中軍曰中領軍永昌元年改曰北中軍候尋復爲領軍成帝世復爲中候尋復爲領軍

護軍將軍案本秦護軍都尉官也漢因之高祖以陳平爲護軍中尉武帝復以爲護軍都尉屬大司馬魏武爲相以韓浩爲護軍史奐爲領軍非漢官也建安十二年改護軍爲中護軍領軍爲中領軍置長史司馬魏初因置護軍將軍主武官選隸領軍晉世則不隸也元帝永昌元年省護軍并領軍